

道光遵義府志

遵義府志卷十

古蹟

家墓附

元凱注左氏道元注水經多引故城故亭以證地望
至於殘壘廢宅亦叢見酈亭書則古跡誠考鏡之資
乎遵義漢唐郡縣其間可借爲談古之佐證者正復
不少而影撰謬附間誤遠人今備列舊聞更加考辨
冀貽好事不爲虛作前人未道亦略增焉若荒誕無
稽概所不取

廢營縣

方輿紀要在桐梓縣北漢置縣屬牂柯郡

志云縣有不狼山營水所出縣以水名梁末廢段玉

裁說文注今貴州遵義府府城西有警縣故城

按桐梓北及府城西各據所見要是廢縣在府境內也顧氏又以警縣在雲南陸涼州段氏已斥其非

廢播州 通志在府北三百里白綿堡昔楊光榮子孫承襲守此宋端平中置州

按今考定唐之播州舊治在今綏陽縣治左右說詳建置其在白綿堡者乃宋之播州宋書地理志端平三年以白綿堡置播州是也然謂在府北三百里相沿承誤詳後

遵義廢縣

方輿紀要在府東北百里唐遵義縣地

宋大觀三年析播州地別置遵義軍及遵義縣宣和三年俱廢置遵義砦改隸珍州開禧三年復升爲軍嘉定十一年仍降爲砦元初廢入播州

按顧氏以遵義在府東北百里與今所考定合知以今綏陽爲卽唐之遵義前人必已有論及者惜顧氏不明言所本也

帶水廢縣

明統志在宣慰司北三十里唐貞觀間

置宋宣和初廢爲城屬南平軍

四川舊志通志同

方輿紀要

在府西北四十里

按元和志帶水縣因縣北有帶水爲名東至播州
七十里攷帶水卽今之洪江播州治卽今綏陽帶
水在其西七十里則縣治當今長灘左右前志謂
去府道里極合惟言在府北及西北方向殊誤至
明統志云宣和廢縣爲城屬南平軍紀要亦沿其
說此於史無明文當別有所見

芙蓉廢縣 方輿紀要在仁懷縣南唐貞觀五年置
隸牢州二十年改隸播州咸通中廢

按芙蓉當在正安接綏陽之間今猶有芙蓉江可
證互詳建置

廢溱州

明統志

在宣慰司北二十五里

四川舊唐志同

貞觀中置憲宗時嘗以珍州省入宋熙寧中復置並置溱溪縣景炎三年廢通志在府城北二十五里

按元和志溱州以南有溱溪水爲名可見州治在溱溪之北又所領榮懿縣云郭下則榮懿州治也據宋趙牟氏墓誌云趙氏家榮懿孺人葬於輓蘭塢今其墓在綦江縣東永里金蘭塢揆當時必葬在榮懿境中是溱州舊治亦必在今綦江永里接桐梓青羊市等處以元和志州之八到校之其東南至黔中取珍播夷路是其路過珍州始達播州

則於今遵義中隔一珍州矣安得在司北二十五里乎紀要亦斥舊志爲誤

榮懿廢縣

方輿紀要在真安州東南

扶歡廢縣

四川舊志在夜郎里通志在桐梓縣北

二百里扶歡山下唐貞觀十六年置屬濠州按扶歡廢縣思南遵義兩府志俱載皆云在扶歡山下查山川志思南無扶歡山遵義志載在桐梓應以遵義殆爲確

按今桐梓北界中有扶歡垠與綦江縣錯壤唐置縣當在是故今尚沿舊名

廢珍州

明統志

在真州長官司西南四十里唐貞

觀中開山洞置播川鎮後以鎮爲珍州長安中改舞州開元初又改鶴州後復爲珍州宋因之遺址尙存

通志

按明統志廢珍州云云考唐地理志唐貞觀十

六年開山洞置珍州並置夜郎麗皋樂源三縣元和

二年州廢縣皆屬溱州珍州未嘗復置也且並無改

舞州鶴州之說攷貞觀八年以辰州之龍標縣置巫

州因析置夜郎朗溪思微三縣天授二年又析夜郎

置涓溪縣改巫州曰沅州長安四年以沅州之夜郎

涓溪二縣置舞州開元十三年以舞武聲相近更名

鶴州二十年曰業州大厯五年始更名獎州是舞州
鶴州乃沅州之夜郎所置非珍州之夜郎所置也蓋
州郡之更改無常山水之名稱常在舞州當因舞溪
而得名在今鎮遠府之域夜郎析自龍標在今黎平
沅州之間與鎮遠近與珍州遠一統志因夜郎之名
而誤載耳

按珍州之非舞鶴兩州通志攷辨已明而仍沿統
志謂廢州在正安州西南四十里不知其非也據
元和志珍州所領夜郎縣在郭下則州治卽夜郎
丹鉛錄云夜郎在桐梓驛西二十里有夜郎城碑

尚在楊氏此據目見言之其碑必是唐未廢縣時所立是今之夜郎垣正卽唐珍州治所以準之元和志珍州八到東南至播州二百里北至濠州二百四十里方向道里更古今相合蓋見統志非是丹鉛錄又云珍州在施州歌羅寨是其說自相牴牾不足信

麗臯廢縣

方輿紀要在真安州西三十里

樂源廢縣

明統志在真州長官司西七十里唐貞

觀中置屬濠州宋末屬播州後廢四川舊志在州治西有遺址**方輿紀要**在真安州西七十里通志同

按元和志云夜郎麗臯樂源三縣並在州側近或
十里或二十里隨所畚種田處移轉不常厥所如
此則麗臯樂源當亦在今夜郎垣左右二三十里
內

夜郎廢縣

四川舊志在桐梓驛有址通志在桐梓

縣北七十里唐貞觀十六年與珍州同治後廢宋大
觀二年復置宣和二年廢卽志在城北七十里夜郎
垣城跡方圓里許中有獅子碣古樹蒼蔚人不敢伐
相傳爲夜郎縣亦爲竹王城

按卽志以夜郎縣卽竹王城通志分載爲二今驗

竹王城實在新站去夜郎站二十里則兩處是也

都上廢縣

明統志在舊承州西南二十五里四川

舊志作一十五里方輿紀要在綏陽縣西南二十五

里通志在正安州西南二十五里唐武德元年置隸

黔州貞觀四年以縣置夷州宋宣和中廢

按元和志都上縣西北至夷州五十里夷州西南

至播州二百四十里時夷州治綏陽綏陽在今龍

泉縣左右由夷至播方向道里古今俱合都上往

夷州向西北行則其縣在夷州東南也治當在綏

陽接湄潭之間不得在正安境內紀要頗近之

義泉廢縣

明統志在舊承州西南一百里

四川舊志同

隋大業間置隸明陽郡唐隸義州宋隸承州宣和中廢方輿紀要在綏陽縣西南百里通志同

按元和志義泉縣東北至夷州一百里明統志以下皆是本之而不知夷州郭下之綏陽乃今龍泉縣不得以今之綏陽當之其他誤皆同此準元和地望義泉當在今正安境內

洋川廢縣

明統志在舊承州西北一百里

四川舊志同

唐武德初置屬義州貞觀中屬播州後廢方輿紀要在綏陽縣西北百里

按元和志洋川縣東至夷州一百里則縣正當今
綏陽旺草里界內通志以廢洋川縣在石阡府西
北苗民司南洋溪山下意以洋溪卽古洋川然與
元和志方向道里大不合不如統志紀要差近惟
所云承州綏陽是指今之綏陽則非也

寧夷廢縣

明統志在舊承州東二百里武德初置

屬夷州貞觀初改屬務州後屬思州宋初置屬承州
方輿紀要在綏陽縣東二百里**陳志**在府城東通志
同

按元和志寧夷縣西北至夷州一百九里則縣當

今龍泉東南也治當在湄潭境內

高富廢縣

明統志在舊承州東北一百一十里唐

武德四年置屬夷州貞觀初屬務州又屬黔州永徽以後省**方輿紀要**在綏陽縣東北百十里**四川舊志**在舊承州東北百里**通志**在綏陽縣東北趙家里

按新唐書貞觀元年廢夷州分隸所領諸縣高富以隸務州十年又以隸黔州黔州治今彭水縣地改隸必就所近知高富去黔州不遠謂在綏陽東北百十里及趙家里未可信

信安廢縣

方輿紀要志云在義泉縣南唐武德初

置貞觀中廢入義泉

按信安蓋在今正安界中說見建置

樂來廢縣

方輿紀要在真安州東唐貞觀中置縣

屬溱州咸亨初廢入樂懿

按樂來當在正安西北云東不合

明陽廢縣

方輿紀要寰宇記綏陽縣西北百里有

舊明陽郡城隋所置郡也理明陽縣唐武德四年明

陽縣隸夷州六年改隸務州貞觀中省

按寰宇所指綏陽乃今之龍泉通志廢明陽縣在

龍泉縣西沿其說也顧氏以爲今綏陽誤

宜林廢縣

方輿紀要在綏陽縣南境唐武德初置

尋屬牢州貞觀十六年與州俱省

按樂安宜林瑯川三縣後皆省入芙蓉今遵義縣東樂安里蓋卽樂安縣舊地宜林瑯川地必與之毗連故併入芙蓉爲便顧氏以宜林在綏陽南境極合

鷄翁廢縣

方輿紀要在綏陽縣東南唐武德四年

置屬夷州六年廢貞觀六年又置永徽中省

按通志廢鷄翁縣在龍泉縣北二十里鷄翁山下是也

瑯川廢縣

方輿紀要

在仁懷縣東南唐貞觀中置

隸牢州十六年改屬播州開元二十六年省入芙蓉縣宋大觀中更置播州兼領琅川縣卽瑯川也宣和三年降爲琅川城隸南平軍尋廢

胡刀廢縣

方輿紀要

志云在仁懷縣西南五十里

唐貞觀九年置釋鸞縣屬牢州十一年州廢縣省十四年復置改胡刀以縣南一里有胡刀水東流合於烏江也縣屬播州開元二十六年廢

按通志謂廢胡刀瑯川兩縣俱在施秉江外屯地

俗名偏刀水其說近之蓋胡刀瑯川後皆省入芙蓉

蓉必其地如通志所說乃併入芙蓉爲便若在仁懷則中隔珍州之夜郎三縣及播州之帶水勢不能併入芙蓉矣且紀要謂胡刀縣南一里之胡刀水流入烏江今仁懷境中故無入烏江之水也又紀要引舊志云夷牢水入廢胡刀縣界帶水亦至廢胡刀縣界注胡江夷牢水卽今樂安江帶水卽今洪江湖江卽今烏江以此水道求之胡刀之在邊義接涓潭界中更顯然可見

舍月廢縣

方輿紀要

志云在縣東南九十里唐貞

觀九年置高山縣屬郎州旋廢十三年復置改舍月

以境內舍月山爲名

按播州五十四里中有水煙里卽元史之水煙等處地在今遵義縣西天旺里水煙與舍月其聲相近又舍月初名高山高山或是高遙山省稱今高遙亦在遵義縣西三十里去水煙落僅三十里縣地或卽在其間歟

湖江廢縣 **方輿紀要**在仁懷縣東南四十里貞觀九年置屬郎州旋廢十四年改置湖江以界內湖江水爲名

按紀要於烏江云或謂之邗水或謂之湖江於帶

水云東流至廢胡刀縣界入湖江水湖江卽烏江
此云縣以湖江水爲名則其地必在烏江上下若
仁懷舊縣去烏江四五百里謂廢縣在其地不合
且蘭廢縣 平夷廢縣 談柅廢縣 鐔封廢縣
方輿紀要地記府東南有鐔封廢縣且蘭廢縣在府
南談柅廢縣城在桐梓縣西南平夷廢縣在桐梓縣
西北

按且蘭在平越鎮遠平夷在大定談柅在興義鐔
封在貴州興義雲南羅平之間與遵義遠不相涉
詳詳柯十六縣攷顧氏此說大誤

播川廢縣

通志

在桐梓縣南三里

四川舊志同

宋置後

廢

綏陽廢縣

明統志

在真州長官司東南二百五十

里隋置屬思州唐夷州治此宋大觀初置承州割隸

珍州後廢

鼎山廢縣

賈志

在桐梓城南十里

四川舊志同

元置後

廢城門尚存

石榜鐫寶祐戊午四字

邱志

縣峙羣山

之顛周圍峭壁缺處磚砌若鼎故名鼎山一徑盤折

城門雙拱池水營塹尚存

廢南平軍

通志

在桐梓縣北

一百里宋熙寧八年

置後廢明統志在綦江縣南九十里

舊正安州城通志在今之州東南七十里地名滴

水園明萬曆間平楊應龍置城垣尙存

白綿堡宋史端平三年以白綿堡置播州輿地紀

勝南平軍在白錦堡去播川三百里係納土官楊光

榮子孫世襲守之明統志白錦堡去播州三百里四

川志白錦堡在綦江縣南八十里白綿白錦字相似

而誤

附鄭珍白錦考自王氏說白錦去播三百里後皆

沿之堡遂在綦江境內矣今考潛溪集楊氏家傳

云光榮籍播州二縣地往獻於朝詔卽其地建白
錦堡此堡名所由始也後又云軫病舊堡隘樂
堡北二十里穆家川山水之佳徙治之是爲湘江
此卽今之府治云在堡北二十里則堡在今府治
南二十里無疑若堡在綦江境上去穆家川三百
里而遙楊氏無故舍其世守遠徙如此已大非情
事且由綦江往今府治地越溱珍二州楊軫宋高
宗時人其時溱珍境內皆有土酋據守安得任其
自由且楊氏自唐末以來世守只是播州若至是
始徙穆家川則前此皆治在南平軍矣不與史志

大外乎然則家傳得其實矣又按家傳敘端之入播云端詣瀘州合江逕入白錦軍高遙山據險立砦結土豪爲久駐計又敘楊寶弟先蟻擁兵事云先據白錦東遵義軍號下州蟻據白錦南近邑號揚州稱南衙將軍舉兵攻先且外結閩兵爲助楊貴遷大發兵設二覆於高遙山要其歸而擊之閩大潰赴水死者數千蟻亡入閩觀傳文可知白錦爲楊端前舊名至光榮獻地建堡乃得堡稱所稱高遙山在今府城西三十里山麓卽松邱寺所稱閩或稱羅閩卽指今水西所稱赴死之水卽今樂

閩河樂閩蓋羅間之訛當時河西卽近閩地觀傳
敘三公歸閩事云阿永蠻發兵納三公界上會濟
江夷獠引舟岸北云云江卽是此水岸北卽是界
上則閩播以樂閩水爲界甚明白所稱遵義軍乃
宋於唐之遵義縣置者地爲今之綏陽此史家據
後追稱時尚未置軍也統家傳前後文繹之知楊
端入播其路由合江出仁懷逕至高遙山立砦以
備攻守白錦必在山之附近定播之後遂世居之
想其時唐之州治在今綏陽者遣子弟分守而已
故宋卽堡置播州而以唐州治置軍今綏陽正在

府治之東於治南二十里之白錦亦在其東宋文獻據譜立傳故能事事實合可以裁度諸史堡去播三百里之說祇見其誣矣今府城南四十里有市曰懶板橙西距高遙山十里市名極無意義疑其地卽古之白錦自楊軫北徙穆家川人以其地在南遂稱爲南白錦南嬾白板雙聲錦橙疊韻歷久音訛遂成今稱或曰如此卽與二十里不合曰白錦之地廣矣藉此相沿舊稱知故堡要在其近豈方數十丈之外遂不可以白錦之名被之乎

縣垣 在正安孫志先代建縣處

悠久垣

孫志正安下卽今州治

按垣卽今正安舊城

南縣籌

正安州志在州北二百里**孫志**有先代城

址

五尺道

史記西南夷傳秦時常頴略通五尺道張

守節正義括地志云五尺道在郎州**顏師古漢書注**

其處險阨故道纔廣五尺

說詳建置

巴符關

水經江水又東過符縣北注**縣故巴夷之**

地漢武帝建元六年以唐蒙爲中郎將從萬人出巴

符關者也

按漢書西南夷傳唐蒙從巴苻關入見夜郎侯多同史記作巴蜀苻關苻與符字形相近水經注作符要是本史漢爲說且巴符關者謂巴地之符關也若是苻則其地在四川雅州非巴國境繫巴於關名上無取也如酈氏言蒙當時蓋從合江仁懷進乎其關在何處不可考矣

貓兒壩隘

元史文宗紀天曆二年正月四川囊加

台攻破播州貓兒壩隘

烏江峯

元史文宗紀

天曆二年播州楊萬戶引四

川賊兵至烏江峯

按峯當在今烏江關茶山關之間

南山寨

方輿紀要在真安州西南七十里亦謂之

石城卽鄭昌孫屯據處四裔考明玉珍時其將江中立築舊珍州城以守州將鄭昌孫據石城扼之今南山寨是也明兵至昌孫執中立以獻因得世有其地

通志在正安州相傳宋末州人鄭昌孫據元兵於此

思義寨

方輿紀要在真安州東南九十里志云唐

初爲思義縣屬夷州貞觀初屬務州後廢舊稱珍州

五堡曰麗皋曰思義皆因故縣置曰白崖曰安定曰

壽山則擇險置戍處也萬曆中官軍征播皆屯駐於此

吼灘砦 在仁懷吼灘里輿地紀勝在南平軍西南八十里原係巡檢駐劄舊名吼灘砦以其名似無安靜之意改正春堦

崖頭寨 方輿紀要在府西南百里入水西界內萬曆末討水西賊魯欽克崖頭寨乘勝深入至織金堡敗績

陶洪安村羅村三砦 明史吳廣傳陶洪安村羅村三砦士官各出降他部來歸數萬廣擇其壯者從軍

按安村寨在仁懷縣西八十里羅村砦在仁懷縣西百里舊爲安羅二氏所居今安羅里皆其地也陶洪不知所在

苦竹羊崖銅鼓三寨

明史馬孔英傳連破九柞黑

水諸關苦竹羊崖銅鼓諸寨

按三寨史傳敘在破桑木關風坎關之後知其地皆在綏陽境中今綏陽治東九十里苦竹關苦竹寨當在左右餘未詳

楠木山羊簡臺三峒李漢垠

明史劉綎傳二十八

年正月直搗楠木山羊簡臺三峒絕險賊將穆照

等率眾數萬連營諸將憚之縋分兵攻其三面大戰於李漢垠生擒其魁餘賊奔入峒乘勢克三峒直搗峒前焚之盡克三峒擒穆照及賊魁吳尚華方輿紀要楠木峒在府北二百四十里其南爲山陽峒及簡臺峒名曰三峒由綦江東溪入播三峒素稱奇險劉縋直前奮擊克之播於是不可守

按李漢垠在仁懷縣北三百餘里楠木峒在垠側極廣大中可容數萬人峒口崖上有平虎穴三字距地數十丈未詳何人書傳昔時入洞者拾金銀無算山羊簡臺當去楠木不遠

滴淚三坡瓦窰坪石虎諸隘

明史劉綎傳踰夜郎

舊城攻克滴淚三坡瓦窰坪石虎諸隘直抵婁山關

按滴淚三坡卽今之夜郎三坡瓦窰當在三坡之

南傳上文云應龍遣子朝棟維棟統銳數萬由松

坎魚渡羅古池三道並進綎伏以待賊至伏起追

奔五十里賊聚守石虎關石虎卽今石壺關在桐

梓縣北三十里

養馬城龍爪固海雲固松門埡

明史劉綎傳都指

揮王芬獨營松門埡之衝賊襲殺芬綎率騎往救賊

大奔追至養馬城而還馬孔英傳追奔至高坪奪賊

養馬城方輿紀要養馬城在府北五十里楊氏據播時所築劉綎入婁山關屯白石口賊黨攻圍綎擊敗之追至養馬城與南川永寧諸路之師會連破龍爪海雲諸險固壓海龍固而壘通志養馬城在遵義縣北三十里唐末楊氏建爲牧馬地可容馬數萬也按松門埡在府城北六十五里俗名風門埡龍爪海雲兩固僅見於顧氏書地當去海龍固不遠養馬城今猶存周五里牆高丈餘養馬城側有養雞城石城門二距里許又有養鵝池皆楊氏所爲

全月二城

明史李化龍傳六月綎破土月二城應

龍窻與二妾俱縊明晨官軍入城方輿紀要萬曆二十七年官軍克播州進圍海龍囤囤前陡絕飛越難至諸將以勁兵壁其間而並力攻囤後別將徐成奪據鳳凰嘴賊奔土城官軍毀城而入賊進據月城因縱火焚其土城月城二樓四面奮擊遂克之

按土月二城並在海龍囤上逆龍所憑以守者敘二城之破紀要較史文特詳

海龍囤 明史李化龍傳海龍於諸險中爲最方輿紀要在府北三十里四面斗絕後有側徑僅容一線楊應龍倚爲天險

按海龍在府城北四十里龍巖山東一帶孤懸羣山固結左右環溪陰深峻險舊名龍巖固父老言楊逆據此時曾堰海龍垣之水使環固下自宣慰司至固二十里外卽乘舟而往未知然否其固播平後兵備道傅光宅卽其上建海潮寺

海龍九關 方輿紀要楊應龍於固前築九關以拒官軍

按海龍固前後關今可考者前六關曰銅柱鐵柱飛虎飛龍朝天太平後三關首曰萬安餘未詳此所謂九關也明史馬孔英傳所稱海龍第二門吳

廣傳稱第二關皆此九關之一銅柱八關皆在圍上惟太平距圍前十里址今無存飛虎飛龍朝天萬安榜並欵驃騎將軍楊應龍書餘榜不存獨飛龍毀左角乃劉綎自對山飛礮所摧者若孔英傳海崖海門吳廣傳第四關第一關皆非此數

後水圍

明史劉綎傳克後水圍營於冠子山

按後水圍今未詳所在冠子山在府城北九十里知圍更在冠子山之北

永安莊

明史劉綎傳直抵婁山奪其關追至永安

莊綎老將持重慮賊衝突聯諸營一據永安莊爲前

營

按永安莊在府城北八十五里楊氏別莊也今其宅基尚存石工甚精緻

桃溪莊

方輿紀要萬曆中水西安疆臣討楊應龍

由西路沙溪馬站石壁花毛田而進奪落濠關至大水田焚桃溪莊逼近播州賊勢遂窘

按桃溪莊在今桃溪上源所稱上莊下莊是楊氏別業也石壁卽今石鼻莊在府西一百里落濠關卽今樂民城在府西五十五里花毛田在府西八十里大水田在府西三十里明史童元鎮傳賊伏

兵大水田是此皆水西由沙溪入播所經馬站未
詳

青蛇長坎瑪瑙保子四囤 明史陳璘傳璘次湄潭
賊悉聚青蛇長坎瑪瑙保子四囤地皆絕險而青蛇
尤甚 李化龍傳江鐸統楚師夾攻板角關破之再進
破瑪瑙長坎保子等囤奪楛木關進屯青蛇囤

附鄭珍四囤記遵義東界大山望之隱天若長壙
其南爲三度關北爲板角關由遵義道湄潭者出
三度由綏陽者出板角二處山稍平展中距八十
里皆亂峰斗壁其間長坡坎者間道也自坎行若

蝨循衣縫以達湄潭境余家至長坡坎蓋僅二十里此山西皆樂安里地地皆陂陀平遠登高俯視數十里如微風動波也其去郡西限標崖諸山又西限瑪瑙孔諸山又西限清乘橋諸山余自家朝食行二十里登標崖復十里登瑪瑙孔復十里度清乘橋卽登山越山巔達郡四十里皆坦途矣此東來山數重獨清乘橋西諸山用兵時尤險要山蓋圖經所稱水圍者洪江三面環而過江兩岸皆懸壁一二百尺而西岸又羣峰如削山縫中今尙無牛羊徑舊時距今橋上里許岸稍缺處橋平石

今猶有二齒存東來者意度橋必仍沿岸下直今
橋越山蓋舍今山顛左右望皆窮也今橋康熙初
當極險狹處建據碑乃易舊清水名清乘橋余往
來必流覽橋上思當日措手之難至顛也必小息
顧顛廣僅二丈而一畔舊砌依稀關門然餘隱露
土中皆似門圯之石常疑之又不解橋舊名清水
意今年初夏攜妻兒種菜于午山目極百餘里歷
指某某地示之因擬議清水說皆不安之甚予知
同旁植紫蘇曰人呼此祖師葉焉知清水清乘非
青蛇乎余思久之曰是也當八路師之平播也陳

璘軍由偏橋進傳曰璘次湄潭賊悉聚青蛇長坎
瑪瑙保子四圍地皆險絕而青蛇尤甚璘乃先攻
三國次及青蛇督將攻三日三國遂下青蛇四面
陡絕璘圍其三面購死士從瑪瑙後附葛至山背
舉礮賊惶駭諸軍進攻賊退入國內木石交下將
士冒死上前後擊之賊大敗乘勝抵海龍圍下山
此推之蛇與水俗讀同僅分平上清水卽青蛇也
橋以地名建者吳之茂武夫非紀碑不得其字苟
從俗改清乘以文之乎山頗似關門者非楊氏之
雄關乎傑與標聲亦近今標巖非卽保子岡乎然

則長坡坎卽長坎圍瑪瑙孔卽瑪瑙圍其名蓋至
今存也當時璘旣入板角四圍不破終不能抵海
龍長坎保子瑪瑙三圍不破終不能攻青蛇青蛇
旣破此時李應祥破黃灘三關人在青蛇之南馬
孔英破朗山關人在青蛇之北逆酋心腹四潰無
巨險可恃宜璘之鼓行至海龍如走康莊矣嗟夫
數十年往來習貫之地一旦啟悟於黃孺之口而
始得古名天下事千百年以上千百里以外可以
影響論斷卽自詡得之乎故記以告考地理者

沙溪園

方輿紀要在府南九十里與貴州接界楊

應龍叛遣其子朝棟守沙溪緝麻山防永寧貴州之師既而安疆臣由西路入拔沙溪圍

水煙天旺諸圍方輿紀要志曰楊應龍反時增修各圍險隘府西南有水煙天旺諸圍接貴州界者又有洪頭高坪新村諸圍府北則有松坎大阡都項諸圍皆其拒守處

按水煙今名水園在府西七十里舊時酋長宋氏之後居之天旺在府西六十里今名天旺都洪頭諸處未詳

穿崖圍

明史吳廣傳郭通緒扼穿崖圍廣督漢土

軍擊破之

按廣時頭二郎埧知此固在遵義仁懷之間

桑木埡

明史吳廣傳分四哨進攻崖門別遣永寧

女士官奢世續等督夷兵二千扼桑木埡諸要害以

防餉道

按桑木埡在府城西北二百四十里

丁山銅鼓巖村

明史劉綎傳諸將克丁山銅鼓巖

村

按丁山卽仁懷之丁山埧仁懷縣二合樹上流有

大銅鼓小銅鼓二潭銅鼓當卽其間地巖村未詳

松坎魚渡羅古池

明史劉綎傳應龍遣子統銳卒

數萬由松坎魚渡羅古池三道並進

按松坎卽桐梓北之松坎仁懷縣有魚子溪東北流百餘里爲綦江縣之清溪河魚渡當在此水羅古池未詳

大夫關馬坎 明史童元鎮傳瑯猷揚聲搗大水田而潛以一軍拔大夫關直抵馬坎

按大夫關在府西南四十里今名大夫坎馬坎卽今馬坎關在府西二十里

官垣

方輿紀要在府東北楊應龍叛屯官垣聲言

窺蜀西陽宣撫司冉御龍進攻官垵斬關直上賊方
攻葵川聞敗遁還通鑑輯覽注官垵在遵義府城西
北

按官垵蓋在綏陽正安之間當西陽入播路

張王垵方輿紀要在府東南百里黔帥李應祥敗
楊應龍之兵屯張王垵旣而劉綎之兵自白石口入
應祥自張王垵入吳廣自江水口入陳璘自上度關
入安疆臣等自大水田入共破播州

按張王垵在府東南九十里

二郎垵

明史吳廣傳廣屯二郎垵大行招徠

按二郎埧在仁懷縣二郎里

金子埧 明史馬孔英傳國柱攻金子埧無一人疑
有伏焚空砮十九嚴兵以待

按金子埧在綏陽縣西二十里

朗山蒙子橋高坪 明史馬孔英傳官軍進朗山進
蒙子橋深箐翳賊處處設伏悉勦平之珠夜劫營
伏發賊驚潰追奔至高坪

按朗山卽綏陽縣西之朗山關蒙子橋在府城北
二十里高坪在府城北三十里

新站

明史童元鎮傳河渡未敗時澄已別遣部將

劉岳王嘉猷攻破苦竹關及半埧嶺暨敗二將移新
站殉難錄佐聖察邊城形勢孤危去治二十里卽安
藺兩酋巢穴出沒不時乃相度險隘至地名新站前
臨渭水爲人犯必由之路遂捐貲購料督率隘官雇
募里民創築新站城曰寇至可以遏其鋒深入可以
絕其歸若西酋越此窺府城當使隻輪不返於是招
集流亡訓練部伍開屯沿邊一帶時率將領往來巡
視邊備畢舉

按新站在府南六十里爲至會城所必經

清潭洞

明史童元鎮傳永順兵攻清潭洞復擒五

受

按洞當在遵義縣清潭里境內

桑木關風坎關九杵關三渡關老君關河渡關苦竹
關黃灘關板角關崖門關明史李化龍傳推官高
析枝先以南川兵進據桑木鎮江鐸統楚師夾攻板
角關破之馬孔英傳逼桑木關殊死戰奪其關逐北
至風坎關連破九杵黑水諸關陳璘傳分兵六道攻
克大小三渡關李應祥傳賊所恃止黃灘一關壁立
眾死守董元鎮傳諸軍既濟復奪老君關前哨參將
謝從爵再拔河渡關澄遣部將攻拔苦竹關吳廣傳

分四哨進攻崖門

按桑木關在綏陽縣東北二十里風坎關在綏陽縣北二十里九杵關在綏陽縣東三十里三渡關在府東一百一十里老君關在府南九十里河渡關卽今茶山關在府東南一百里黃灘關在府東南一百一十里板角關在綏陽縣南七十里崖門關在府西北一百里今府西九十里黑水關然不當孔英自正綏來路則黑水非此也又綏陽縣東九十里苦竹關與湄潭接近亦非水西兵所攻拔者

明月關 明史馬孔英傳別遣邊兵千扼明月關

按孫志載正安有明月山關或在此

婁山關白石口冠子山 通鑑輯覽萬曆二十一年

四川巡撫王繼光與總兵劉承嗣分兵三道進婁山

關白石口注婁山關今名太平關在遵義府北大婁

山上白石口在婁山關南 明史劉綎傳據婁山關爲

老營據白石口爲腰營踰十日克後水固營於冠子

山 通鑑輯覽注白石口在婁山關南

按婁山關在府北百里白石口冠子山並在府北

八十五里

赤崖

明史馬孔英傳諸軍鼓行前次赤崖

按孫志載正安有赤崖箐卽此

母豬塘

明史吳廣傳諸將連破數囤進營母豬塘

按母豬塘在府北七十里其水卽溱溪舊時有渡

載孫志

按平播時攻戰營壘之城今日視之皆是古跡事
事能指所在大可疏證史文今通考其遺處所不
知者隨事出之其餘如馬孔英傳之清水坪封寧
關白玉臺吳廣傳之磨搶堙紅碗水土崖分水關
水牛塘三山李應祥傳之墳林童元鎮傳之半垣

嶺長箐萬丈林李化龍傳之楛木關其地悉在府境內今亦不能備知所在並記於此來者詳焉

茅衙 在府西北十五里楊應龍爲小妻田惜玉築城造宅居之今城址尙存有寺名茅衙寺

樂蒙城 通志在遵義縣西四十里明天啟間兵備道盧安世築舊址尙存

按城環山砌粗石高七八尺周八九里四方無門今稱樂民城旁有樂民庵碑云崇禎庚午立

沙溪城 在府西百七十里明史土司傳洪武十五年城播州沙溪以官兵一千人土兵二千人戍之卽

此今名沙溪坝

綏陽老城 在綏陽縣北門外大官地左山存土垣
周二十餘丈相傳知縣詹淑初至所居驗現存垣堦
不足爲城况上進建綏陽縣記云詹侯旣至區畫金
竹里創茅茨三間或卽此乎

湘川諸驛

方輿紀要

湘川驛在府東二里湘江上

舊志云自是而東南有仁水湄潭烏江沙溪昌田等
驛相去各六十里播川驛在麻江六十里自是而西
北有永安桐梓松坎等驛四川舊志遵義縣下湘川
驛在城內永安驛治北六十里烏江驛治西八十里

真安州下樂源驛治東六十里樂道驛治西七十里
桐梓縣下播川驛不注所在桐梓驛治北六十里夜
郎驛治北三十里松坎驛治北百里仁懷縣下儒溪
站在小金沙岡永鎮站在大灣前永定站在五岔前
山盤站在山盤前

按孫志遵義三驛湘川永安烏江正安二驛樂源
樂道桐梓四驛播川夜郎桐梓松坎仁懷四驛儒
溪永鎮永定山盤陳志正安添乘鳳一驛今俱廢
據顧氏所引舊志諸驛外又有仁水湄潭沙溪昌
田四驛此爲何時制度不可考今考遵義三驛桐

梓四驛爲北通碁江南通貴州路正安三驛爲通南川武涪路仁懷四驛爲通合江永寧路湘川驛在府城外烏江驛當在烏江岸上永安驛卽今泗渡站播川驛在桐梓城外夜郎驛卽今民朝聚桐梓驛卽今新站松坎驛在今松坎樂源驛今未詳所在舊城西七里有樂道書館樂道驛當卽在是乘鳳驛以乘鳳河得名置驛處當去河不遠儒溪四驛今地與舊志同惟顧氏說播川驛在府西六十里是在遵義管內桐梓驛傳無緣在遵義西境也或曰府西蓋府北之誤果爾何以處永安驛

乎顧氏說非也其仁水湄潭二驛爲通平石路沙
溪昌田二驛爲通大定路仁水驛以仁江立名當
在今蝦子場前後湄潭驛當卽在湄潭縣沙溪驛
或卽在沙溪埧前後昌田無從知矣

火燒州
於此

陳志

在府治東六十里昔楊友楊愛分爭

務本堂

明統志

在貞州長官司西六十里漢尹珍

因其俗以耕殖爲業建此堂**通志**在正安州西二十
里漢尹珍建今有草堂三楹按嘉慶二十年知州趙
宜霖就舊址重建祀尹珍

附趙宜霖重建務本堂序洪惟我

聖朝右文重道天下郡縣凡先哲之著德立言有功於名
教者往往卽其生長燕遊之地祠而奉之所以尊
前賢勵後學也正安之新州場有務本堂遺址相
傳爲漢尹道真先生講學之處先生昔從汝南許
叔重受經書圖緯歸而教授於是南域始知有學
是誠一洗泮柯之陋允爲百世之師矣本年四月
郡太守蘆洲趙公纂輯郡志採先賢遺跡攷著鴻
篇八月又奉撫軍賓谷曾公檄飭各屬以先生木
主供奉書院並於省垣創建專祠俾黔中後進企

先賢而興尚友之思典甚鉅也該地前經本州履勘堂址僅存二丈餘隘於修建旋取堂後三楚會館基地與左右各姓墳壠印契核查俱係歷傳數十餘年無從清理今據會館司事等議讓禹王宮餘地廣四丈長五丈五尺上距圍牆下距石橋左右方正廓充新建堂基具呈存案由是卜八月十三日興工重修爲堂三楹廣二丈八尺修一丈二尺周環以垣並建門樓樓外別造屋二爲守祠居僅匝月而工畢十月之吉謹奉先生木主祠中供祀其歲時祭田及守祠日食別籌以垂永久嘉慶

二十年

至善堂

四川舊志宋大厯建今廢

按堂未詳所在

樂道書館

四川舊志在正安州西七十里漢尹珍

立

按道真傳學南中後人懷賢志舊書館所由建也

謂尹珍建豈其然歟

尹珍講堂

綏陽志在旺草里唐廣明中建明知縣

詹淑重修今圯采冊在旺里金竹岡後移旺草場側

按詹淑講堂銘序云萬厯甲辰秋余修旺草公署

掘地得碑題曰漢尹珍講堂唐廣明元年七月六日播州司戶崔初立西南人向學蓋自珍始唐人標其遺跡必有所據廣明距今六百年講堂不知圯於何代爰卽公所爲講堂仍立唐人故石而爲之銘云云考平播後置綏陽其城池公署卽今縣治中間並無遷徙當日淑修公署得碑復卽公署爲講堂當亦不出今縣署內所稱旺草公署者蓋旺草是綏陽大地名其地甚闊觀明史於桐梓縣猶云以綏陽旺草地置可見非今旺草一里能盡之故淑於今縣治地亦稱旺草後人徒據淑銘不

識地理遂以淑後重建在今旺里之講堂謂是淑原修公署得碑處誤矣

真安州古儒學

四川舊志古遺址在今唐都垣相

傳唐時建學於此

宣慰司舊學

明統志在宣慰司北舊鄉學基洪武

三十三年建爲播州長官司學永樂四年陞宣慰使司學

儒溪書院

綏陽志在治西二十里大溪源中祀唐

柳宗元明知縣詹淑馮工奇重建今圯按淑有存疑記士奇有重修記並載藝文儒溪陳志作愚溪

太白故宅

四川舊志在夜郎里有題碑記陳志在

桐梓治北六十里通志久廢

懷白亭 有二在遵義者川志云在桃源洞內毀壞

明甲申間內閣大學士王應熊重建郡人程古愚詩

云山間明月留佳句江上清風憶昔年一自昌齡于

役後愁心終古在湘川在桐梓者亦稱太白碑亭陳

志云桐梓驛舊有懷白亭內監蜀道難五首詩碣隔

溪有太白書院考碑亭何時始建無從知縣令張皇

黼重建後圯四川學道王奕清囑令金修葺乾

隆間知縣蕭若欽重修

附王奕清重修太白碑亭記唐供奉翰林太白李
先生曾以至德中謫居夜郎故其地多公遺跡夜
郎爲黔南諸郡縣余往歲出典黔闡所至搜訪公
遺跡流連憑弔之不能忘復奉

命來視蜀學之

播州古夜郎地其屬桐梓縣者有夜郎驛

驛東北三十里爲新站有公遺碑鐫公流夜郎時
諸詩相傳碑係公手跡後爲土人無識者毀去茲
乃以舊搨重摹立石者碑覆以亭前令張君皇黼
所建歲久傾圯今歲三月余按試播州過其地乃
捐俸屬令金君爲加修整因念唐時稱詩莫盛於

李杜李公旣蜀人而杜公亦畱滯於蜀久故二公遺跡流傳於蜀爲多然杜公草堂在浣花者卽當省會之地而東屯瀼西亦皆近入峽孔道蜀中遊宦之人類能識之而李公之彰明舊宅匡山牛心讀書臺雖其遺址並在後人亦皆有碑鐫詩文以識其處而恨地稍僻非比杜公浣花之居近在省會爲往來冠蓋之所必經故好事雖企慕之或不盡至其地而余亦爲巡歷之所未及也新站之在蜀尤爲偏遠今適以播州行過此得以拂拭公之後塵而想企公之風流覺去今千百年猶爽然如

見公於殘碑斷句間亦藉以補彰明匡山未至之
缺略也余歸成都將舉杜公浣花草堂之舊而增
修之惜新站地荒隘無能稍爲恢拓姑仍其規模
而葺其頽廢俾遺碑無爲風雨所剝蝕庶使後之
過斯土者咸得藉是以景仰公之芳躅於不沒云
公謫以永王璘事論世者皆能爲公別其冤茲不
復及也蕭若欽重修碑亭記按太白詩才冠絕千
古賀監所謂謫仙人也或翱翔薇省或流離荒裔
仙人遊戲人間無所不可後人視之乃俱艷稱仙
跡甲辰余承乏斯土民苗雜林莽間恆多雀角凡

縣境崎嶇之處閱歷幾徧嘗過新站向茅店投宿
諸生王萬言來謁具言此地有太白亭引余指其
處則荒地才一二弓亭傾而碑仆洗閱之漫漶不
可識旁有王學使勒石卧於地剔蘚視乃悉其顛
禾焉王生好古能文儲材覽爲修葺計又以不可
獨任期同袍者集腋成裘噫太白謫仙人也匡山
讀書之堂牛渚捉月之所至今猶可求訊夜郎地
僻而廣欲指畫其疆域大概在黔蜀間諸郡縣今
之新站太白誠棲息於此題詩於此俱未可知而
好古之士如王生者猶欲因其廢址景其芳躅其

亦可感也夫余因捐俸爲眾倡取千古第一詩人以文此邦之僻陋是其爲仙跡也大矣

永厯錢局 棠陰札記遵義府學署址蓋遺明桂王由榔有遵時鑄錢局司之者其總兵官田子祿見陳志今學牆外石臺下往往拾得永厯錢

講堂 四川舊志在府學明倫堂

大清署教授竇紹燕新建

按卽今明倫堂址

演武堂 四川舊志在府治東門外二里堂燬總兵

吳之茂重建

按卽今較場之演武廳

望月臺 在桐梓夜郎墳相傳太白曾玩月於此

太白聽鶯處 在府治東桃源洞口知府劉詔陞刻

石誌其處

按洞外爲白田墳後人因附會太白白田馬上聞鶯詩謂卽在此類書中有引春浮蟻綠醅初熟暖入鶯簧舌漸調二句謂是太白流夜郎時作通志古跡中途本以爲聽鶯處實證詔陞因刻之石考春浮二句實歐陽修詩見六一居一集明人空腹者雜抄成誤後如類函廣事類賦俱沿之而又便

以爲此處聽鶯之作亦可笑矣太白之未至遵義說互詳山川

二冉故宅 陳志在遵義城東十里今地名冉家林 綏陽志在縣西南五里平木山其址尚存

按陳志無平木山故宅通志並列之以冉家林者稱冉璉冉璞故宅以平木山者稱二冉故居今驗二處當以綏陽平木山者爲是其宅址今爲周氏所居二冉墓亦在附近其遵義之冉家林陳志謂爲故宅想非無據豈二冉兄弟或當時有別業在

遵義耶

道明故宅

在桐梓扶歡上塢今名尙書坪猶道明

讀書處也有道明手植二柏

廖孝廉故宅

陳志在府治北門外

按廖孝廉蓋明末郡縣時舉人廖池

貫珠亭

四川舊志在真安州治南

玉虛亭

陳志李真人珏上昇處

按通志作玉慮亭誤

仙界亭

四川舊志在桃源洞後都督侯國弼建

會仙亭

通志在府東桃源洞元大德間建又名美

哉亭

觀兵亭

四川舊志在府治東門外侯國弼建

月亭

陳志今名何奇垣月中宵通照

威遠樓

明統志在宣慰司治前洪武三年建

按卽今協署前頭門石樓也

宣化樓

綏陽志縣治大門明邑令詹淑建

永安公館

四川舊志舊楊應龍莊宅制甚宏麗

黃花園

陳志卽今之養濟院按在府城東培英書

院側其爲何時何人舊圃不可考

天子宅

在城南六十里白牛山側相傳明建文帝

出逃曾寓此題詩有三宮六院歸何處惟有羣鴉早

晚朝之句其近有接聖林亦以建文得名

寒朋橋

陳志在府城外丁字口昔有道人遺藥葫

蘆於下令病者順水取服之卽愈

古塚碑

陳志在府東長灘河鐵杖道人建

龍山鐘獨刺石黑達樹

陳志昔有異人識此三物

謂有神竒平播後鐘爲水西所取石因修府城不知所在樹存在府治北十里廟山埡

仙人腳

陳志在府治東六十里蝦子場前

水牛石老虎石犀牛石

陳志水牛石在府北百里

形如牛動則年豐萬曆壬寅春動移二丈老虎石在

仁懷下赤水形如虎地亦多虎土人斷其石尾遂無
虎犀牛石形似犀牛在赤水里

趙鍊士遺石 在綏陽黃村墳三撫廟前石二一圓
有斧鑿痕一露角無痕質皆挾沙相傳爲鍊士驅使
之物廟卽其修道處

神仙巖故址 在綏陽朗里洞青寺左昔有仙人鍊
丹於此僧月堊有題詩

獨搖石 在綏陽城東四十五里高十餘丈大五六
圍形如磨一上一下中有石卵一人搖之卽動聲如
鼓聲若數人搖之則不動矣

磨刀石 在仁懷赤水里磨刀溪中相傳劉綆平播
兵由此入親解佩刀磨石上溪亦以名

按赤水里非綆入播之路或別將經此有其事後
以綆名最著加之耳

白鶴亭

陳志在正安舊城相傳楊六郎曾寓此

三塊石

陳志相傳楊六郎曾憩此石上有掌跡**通**

志在正安州其塊字作槐

按俗稱楊六郎者爲楊業子延昭史傳竝無此人
考楊氏家傳楊昭無子業孫文廣嘗與昭通譜因
以子貴遷爲之後此必是楊昭當年憩寓之所後

人因貴遷以後守播係楊業子孫而楊昭又適與俗傳楊六郎名同因附會以爲重耳

箭溪

陳志

水中有箭影無意乃見

義馬坊

綏陽志

在城東街今圯

按義馬事今失傳

廉祿田

在桐梓扶歡垵相傳宋趙高峯置

崖門石雞

在綏陽崖門崖上一石絕肖雞相傳趙

鍊士讀書四川趕水晨去晚歸一日過崖下怒石雞

鳴太早以馬鞭鞭之斷其首今尙存鞭痕

竹王洞

陳志

在桐梓夜郎里

大羅天石 在桐梓城西香樹坪一石嵌楓香樹上
石紋生成大羅天三字云是飛來者鄉人祈雨極有
驗

風崖洞 在桐梓猶光埧洞內有明萬曆甲寅猶清
羣題壁其外崖半石上見一人字絕大

三撫洞 陳志唐乾符間立後三十丈許有大墓
仙人洞 在仁懷李博里深不可測洞口石壁字畫
宛然云張三丰所題無識之者

冢墓附

漢

尹珍墓 正安州志在江三甲務本堂後知州趙宜
霖誌云按省志載墓在江里余曾履勘訪查據本地
紳耆咸稱尹氏世系不存顛末罔據碑碣皆無不敢
漫指今尹公務本草堂余曰因其遺址而新之凡拜
堂下者皆敬仰不忍去可藉以紓式廬展墓之誠焉
按遵義被珍教澤說詳人物至其墓未必在正安
當緣前籍誤以珍爲真州人遂臆揣其墓宅必相
近實傳會之說耳不足信

七王墓 通志在桐梓縣南五里賈志額曰漢七王墓相傳卽竹王父子之墳邱志在治南五里牛星山其墓地久爲民占道光十九年知縣鹿丕宗復其舊址之半立石曰漢竹王古墓

按俗稱竹王墓今尙存其墓石槨頗廣大槨兩牆上刻花草人物類纖俗無漢人墓刻古雅氣其人悉是苗裝或是唐宋間土酋墓竹王起於夜郎豚水地在安順貴陽興義之間無緣死而葬桐梓也

唐

陳信墓 在桐梓城南四十里有碑今不存信爲陳

頭等土司有廟甚靈響

成展墓 在桐梓城北二十里澗壩村展蓋同楊端
入播八姓之一

何大本墓 在遵義城東四十里何家寨前臨仁江
按大本確爲唐人與否無自考說詳土官傳

宋

猶道明墓 在桐梓城北十八里園田壩天井灣

趙高峰墓 在桐梓溪園銅臺

冉璉墓 在綏陽朗里七甲鳳凰山下汪家園其子
孫居正安本邑無人墓久圯嘉慶五年邑舉人周霖

過其墓見石槨中廣似可容一人遂入窺之棺髹漆如新以銅環雙紐懸石上前和署金字爲冉璉名始知是先賢令人掩其石而封之棺上又有金字七言絕句一首霖曾錄出今霖沒無從問矣

冉璞墓 在綏陽金里徐陽臺與其子從周同兆今碑記無存

按二墓通志題云宋二冉墓注在朗水里縣志亦然今者在朗里者爲璉墓而璞墓乃在金里前志並誤

王元開墓

在桐梓城北百里三元埧水龍崖元開

相傳爲宣慰司然無可考

楊孟奇墓 在桐梓墓墳田

楊价墓 在桐梓葫蘆墳

元

楊漢英墓 在遵義城北

明

羅琛墓 在遵義城南清潭里一甲穆家林

楊輝墓 在遵義城南南隅里雷水堰上心齋隨筆

輝與其妻田氏俞氏合墓田右俞左據碑輝字廷彰

係成化十九年葬

楊愛妻田氏墓 在遵義城東四十里官墳觜心齋
隨筆縣東冉家林側有地名官墳嘴俗稱皇墳今爲
李氏業其地前臨仁江四面山形整密乃宣慰司楊
氏祖兆也中石墓十餘處皆雕鏤精工惜無碑碣可
考惟近江竹林邊有方石墓表一缺其一角乃表楊
愛妻田氏者按察司僉事永川進士古其然撰文資
中進士鄧明書丹儒學訓導滇楊馬奎蒙蓋儒士周
易刊石文稱田氏名睿英封淑人少師忠果公之十
三世女孫父宗善母高氏靜默寡言父母謂其必爲
名臣妻長果歸於宣慰敬夫公以其姑俞氏早卒未

獲奉事每歲時薦祀必涕泣如親承色笑又和妯娌睦鄉鄰毫不自形德色值成化庚子邊隅擾亂敬夫行軍在外氏運籌於內卒克靖變又流民入播氏出金數千兩救濟生全遠近感戴卒於宏治三年庚戌年三十一歲葬於宏治十二年己未九月十三日其略如此知爲愛妻者以文中有男名斌也其墓當卽在岍上竹林內敬夫楊愛字惟見此碑

楊烈墓 在遵義城東東隅里七甲官渡河上心齋隨筆應龍父烈墓碑立於萬曆二年甲戌閏十二月十五日乙酉其母墓碑立於萬曆十二年甲申四月

二十三日巳余曾親至官渡河詳審之一碑側刻
孤子應龍立一碑刻哀子應龍立知爲烈夫妻墓不
誤也

張燭墓 在桐梓松坎沙灣燭官安撫司征楊酋死

難謚忠烈

李紹霄墓 在桐梓城南十里南溪口

袁壘墓 在仁懷赤水里之龍塘

傅天鎮墓 在桐梓城南五里七堡山其子元和墓

在城南三里馬鞍山元勳墓在城南五里牛星山

傅爾才墓 在桐梓小牛星山

李天植墓

在桐梓城南十里大竹坝

顧存志墓

在綏陽城西二十里閣老坪邑知縣易

周碑誌略云公四川華陽人前明挂靖錦將軍印加太子太師懷宗未闖賊瀾亂中原張獻忠屠戮四川公舉兵征亂師次綏陽張賊遂望夜郎不敢度未幾事不濟公卒其姪總兵金純葬公於邑之天生橋土人稱太師墳焉壬午秋余承乏茲土邑人士猶稱道不置及訪其故墟則淪落榛莽且侵葬有人爰爲勒石載明禁步以示後亦見忠義之不朽云

唐一元墓

在遵義城北五里官塘

黎懷仁墓 在遵義城東七十里禹門山右梳子岡
王祥墓 在遵義城北高坪

陳敬相墓 在遵義城南平水里十甲掌臺寺後

皮紹翁墓 在遵義府學左三賢祠後碑云皇明誥

贈榮祿大夫紹翁皮老大人之墓左一行云欽差整
飭遵義兵巡道四川布政司參議

永歷丁亥孟春月立

余尙書墓 在遵義北隅里九甲尙書墳

按皮紹翁余尙書俱不詳何人

陳彌高墓 在遵義沙溪里六甲楓香園

程生雲墓 在遵義城北

周萬全妻李氏墓 在皮紹翁墓後

何大妹墓 綏陽志在平木山下俗名烈女碑

楊氏孝女墓 在遵義城北十五里陳家灣其墓石

槨三牖戶具備工甚精巧有二碑一斷泐一略可識

故知爲楊氏女鄉人呼孝女墳相傳孝女生無兄弟

親死竭力營葬兼造已槨於旁葬親後日夜涕泣遂

餓死槨中常著靈異槨門開閉不時人莫能測近年

槨敞棺可見偶有犯者卽癩有人大戲窺之石門閉

不得出家人虔悔過明日門啟乃出故過者無不肅

然

廣惠真人墓

綏陽志在馬鞍山

崇禎妃墓

在遵義平水里十甲米溪後山

按土人相傳如此未詳所自姑出之以備野聞說

詳

國朝

唐廉墓

在遵義城南門外紅花岡

李先立墓

在遵義城南平水里七甲筆峰山下

陳明經墓

在綏陽金里鄉人呼廉吏墓

遵義府志卷十